



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Yangia anidakangma :



Tir Yimyim



tirymyim@aolima



tir yimyim

TAPAK 3

Tanzania Tir John
Magufuli süogo

ECI election Observer asütsü
Devajyoti Hazarika shimogo



VOL. XVIII NO. 154 (ADOK 154)

DIMAPUR

ROGONÜ (FRIDAY)

METSÜREMI (MARCH) 19, 2021

₹ 5.00

COVID-19 Nagaland: Anogo pongububa nisung ka dak danga tashidak meputet

Kohima, Metsüremi/March 18 (TYO): Nagaland nung anogo pongububa atonga nisung ka dak danga COVID-19 tashidak meputeti tashidak menar 12,225 nung dang lir, ta health ketdangsür kati ashi.

"Tanü COVID-19 tashidak menar ka danga meputet aser tashidak anepera kata mali," ta Health Minister S Pangnyu Phom-i tweet asü.

Tashidak potetertem rongnung nisung 11,973 anepogo aser nisung 7 tang temang anepaludar, ta paisa ashi.

"State nung recovery rate 97.93 percent lir," ta Director of

Health and Family Welfare, Dr Denis Hangsing-i metetdaksü.

Tang tashi nung iba tashidak agi nisung 91 süogo aser nisung 154 tanga state-iogo, ta paisa ashi.

Tang Kohima district nung shiranga alir parnok trokprongla dak tashidak keta aliba temaitsü mesayur aser Mokokchung nung shiranger ka dak tashidak keta aliba temaitsü terara sayudar.

Nagaland nung tang tashi nung COVID-19 samples 1,34,580 tendangogo, kong RT-PCR nung tendangba 75,294, TrueNat ajanga 37,486 aser Rapid Antigen Test ajanga tendangba 21,800 densema lir, ta pai ashi.

DoSE-i tekümdangtsü metetdaksü

Dimapur, Metsüremi/March 18 (TYO): Department of School Education-i sangdong ka ajanga ashiba agi, school kar nungbo Pre-Primary kaketshirtem atema regular class tenzüikogo, ajisiüaka sorkari class 6 nungi temapurtem dang February ita 8 nü nungi class tenzüiktsü temelaba agütsür lir aser class 1 nungi 5 tashi March

22 nungi tenzüiktsü temelaba agütsür lir.

Iba ken o dak sendak alirtem dang ketdangsertem nungi temelaba magi Pre-Primary kaketshirtem atema class tenzüiktsü khenyongi memelatsü ta metetdaksüogo aser aibelenba school tekolaktem aser School Managements anema tapet jenjang agütsü, ta metetdaksüogo.

Election atema gari mekazütsü CEO-i metetdaksü

Dimapur, Metsüremi/March 18 (TYO): R.P. Act of 1951 kübok Section 160 nungi Section 165 tashi nung state sorkar nem tashi agüja aliba dak ajemdaker Nagaland Legislative Assembly atema SI-Noksen (ST) Assembly Constituency Bye-Election asoshi state sorkar tenüng nung gari aser tesem balala

mekazüiktsü atema Deputy Commissioner & District Election Officer, Tuensang aser Kohima nem nongloksüogo.

Jurila mesera institution/ lokti tetitentet indang Gari mesera tesem kobasa mekazüikdir item ajak nem R.P. Act of 1951 kübok Section 161 nung ajemdaker compensation agütsütsü.

DC Kohima-i metetdaksür

Dimapur, Metsüremi/March 18 (TYO): Covid-19 High Powered Committee-i, commercial garitem nung nisung abenba densema state nung inyakyim balala salatsütsü asoshi teletmetba agiba dak ajemdaker Deputy Commissioner Kohima, Gregory Thejawelie, NCS-i, nüburtem ajangzüiktsü atema Kohima district nung commercial garitem nung akhi ama nisungtem abentsü temelaba agütsüba

metetdaksüogo. Gari nung amenba taa dena state mokdanga mayu tsüngda koma liasü iba inyakyim dangi meyipa aotsü.

Kasa sangdong ajangasa, osang agütsüba anogo nungi tenzüka tetuyuba tasen magütsü tashi Kohima district ajunga nung iba inyakyim benoka atatsü ta metetdaksüogo. Iba tetuyuba sülen manidakertem temzüng ozüng kübok tapet temerenshi agütsütsü ta DC-isa metetdaksü.

METETDAKTSÜR

Tuensang Town Ao Baptist Arogo Golden Jubilee planning committee ajanga osang ka metetdaksür.

Asenoki toktsür aoba arogo taruba küm 2022 nung Hon Jubilee amongtsü sarasadema renema lir. Iba den sentakba nung taküm küm 2021 Arogo golden jubilee omen "Jungtepshiba" dak ajemdaker telongjem sarasadem sendong ka Dimapur yimtiba nung alitsü sangdonger. Iba sendong ya 21st March 1:00 ako nung Ao Baptist Arogo Padum pukhri nung akatsü.

Tensa koda masü den pei mapa jenti alitsü saka ibai kü shilem ta tangatetba nung iba sendong nung arua atentsü mepishia ayongzüker.

Dimapur Area Sub-committee tenüng nung

Imkongsa : 9862168434

Imti Jamir : 7005741820

Bendangtoshi : 9612373347

Takukumba : 9436007144

Independent nungi toktepba mechi BJP lenir 15 party nungi indok

Guwahati, Metsüremi/March 18 (Agencies): Assam Assembly election agütsü anasa, Independent candidate ama election nung toktepba mechi, BJP-i taoba deputy speaker Dilip Kumar Paul densema lenir 15 tashi Brehostibarnü telok nungi indokogo.

Ticket mataba sülen Independent candidate ama assembly poll nung toktepba atema lenirtem ya küm trok atema party nungi indok.

BJP state general secretary Rajdeep Roy-i ashiba agi, Assam nung BJP tekolakba, Ranjeet Kumar Dass-i iba temerenshi agizükogo.

Züngsem 15 rongnung Paul den Doomdooman nungi Lakshewar Moran, Gajendra Singh aser Priyanka Baruah

nungertem densema lir.

Paul nem party ticket magütsüba sülen BJP nungi anen aser Silchar constituency nungi Independent ka ama tokteper.

Moran ya Doomdooma nungi Independent candidate ka ama tokteper.

Assam Assembly nung menden 126 nungi BJP ya menden 92 nung tokteper aser tanüngba ya külem Asom Gana Parishad (AGP) aser United People's Party Liberal (UPPL) nem yutsü.

Kasa mapang Congress lenir Rahul Gandhi ya Assam election nübuyim atema ananü asoshi Hokulbarnü Assam-i arutsü. Iba state nung Assembly election phase mezüngbuba agütsü lia pa Dibrugarh nung nübuyimtsü.

Hokulbarnü Rahul Gandhi-i

Lahoal, Dibrugarh nung college students den ajuruteptsü aser iba sülen Panitola Block, Dibrugarh kübok Dinjoy nung süngolu inyaker dangi aotsü.

Gandhi-i Town Field, Tinsukia nung lokti senden ka nung jembitsü. Iba sülen tenu Priyanka Gandhi Vadra-ia Assam semdangtsü sentong lir. Taoba mapang tenaprongi Assam semdangogo.

Congress teloki Assam nung küm 15 yimsü sür 2016 küm BJP-i tsükdaksü aser taküm telok balala den sendakteper tanaben shilangtsü imlar.

Assam nung Congress-i AIUDF, Bodoland People's Front, CPI, CPI(M), CPI(ML) aser Anchalik Gana Morcha den lungjemer taküm Assembly election nung tokteptsü.

Yaküm Covid dang nungibo gari lendong nung nisung timba asü: Gadkari



Nitin Gadkari (File photo)

New Delhi, March 18 (Agencies): Brihostibarnü Road Transport Minister, Nitin Gadkari-i, sorkari gari lendong tajemba kümdaksütsü atema nendaka inyaker, kechiyong tesüiba küm ka tsüngda linük nung coronavirus tashidak agi asürtem dang nungibo gari

lendong nung nisung timba süogo, ta metetdaksü.

Lok Sabha nung Question Hour mapang Union Minister, Gadkari-i, gari lendong kanga bulua atalokba atema sorkari tebilemstü akar, anungji gari lendong ajema kümdaksütsü atema mera agia inyaksü, ta

metetdaksü.

"Yaküm gari lendong nung nisung lakh 1.5 asü, aser ibaji coronavirus tashidak agi nisung lakh 1.46 asüba dang nungi timba lir," ta pai metetdaksü.

Minister-isa, gari lendong nung asürtem timbaka arrshi küm 18 nungi 35 tsüngdapurtem liasü, ta metetdaksü.

Tawa World Bank report ajanga ashiba agi, alima nung gari lendong timtiba atalokba linükji India lir; India nung küm shia gari lendong nung nisung lakh 1.5 shi asür, nisung lakh 4.5 shi tashie yirua lemtar, aser item lendong ajanga GDP shilem 3.14 shi takoksa angur.

Covid wara ajanga India nunger million 32 sensak tia iogo

New Delhi, March 18 (Agencies): Yaküm coronavirus wara ajanga senotsü tsütsü timtem ajangshia middle class pur India nunger million 32 shi sensak tia iogo, ta Brihostibarnü osang ka ajanga metetdaksü.

India nung middle class purtem (anogoshia India nunger sen 700-1400 angurtem) million 32 shi sensak tia iogo, aser ibaji wara ajanga lir, ta US nung aliba Pew Research Centre report ajanga metetdaksü.

Alima nung middle class pur million 66 shi ajema kümogo aser timtiba ajembaji India linük nung lir, ta Pew Research Centre-i metetdaksü.

Yaküm January ita nung World Bank-i 2020 küm India nunger rongsenkettsüng ainba shilem 5.8 aser China nunger shilem 5.9 asütsü, ta asadangteta liasü, ajisiüaka küm piyog wara ajanga rongsenkettsüng jenjang mejungi küma taküm January ita nungbo World Bank-i India

nunger rongsenkettsüng jenjang shilem 9.6 agi tamajungba akümtsü aser China nunger shilem 2 dang aintsü, ta metetdaksü.

Wara ajanga nisung aikati senotsü tsütsü timtem ajangshiba mapang nung India nung gari totzü jenjang shilem 10 atuba, mapa makai akümba aser itasen ajemtsüba ajanga kibong milllion aika timtemdar aser ibaji ajanga nisung aikati bendanglen mapa bushitsüsa akümer.

State nung nisung 50,000 dak tema COVID-19 mozü agiogo

Kohima, Metsüremi/March 18 (TYO): Nagaland nung Brehostibarnü tashinung COVID-19 mozü nisung 50,000 dak tema nem agütsüogo, ta health ketdangsür kati ashi.

State nung nisung 50,601 nem COVID-19 mozü doses 65,767 agütsüogo, ta State

Immunization Officer, Dr. Ritu Thurr-i ashi.

State nung tang tashinung mozü ya frontline worker 32,274, healthcare professional 11,481, teintet rogo 5,670 aser arishi küm 45 dak tema danga tashidak keta alir nisung 1,176 nem agütsüogo, ta pai ashi.

Healthcare worker 7,000 aser frontline worker 8,166 nem COVID-19 mozü tanabuba agütsüogo aser parnok full course agiogo, ta pai ashi.

Mozü agia alirtem rongnung nisung kata mozüki nung yariteptsüsa timtem ajangshia mali, ta Dr. Thurr-isa ashi.

Mokokchung nung IHIP training agia liasü



Dimapur, Metsüremi/March 18 (TYO): Anogo asem tashi IHIP (Integrated Health Information Platform) indang training sentong ka Conference hall, Chief Medical Officer Office, Mokokchung nung March 16-18, 2021 anogotem agia liasü.

Ano maneni ANMs tem atema training ka Medical Officers ajanga Block level nung March 19, 2021 nü agütsüsü.

Chief Medical Officer Office, Mokokchung nungi sangdong ka ajanga ashiba agi, Ministry of Health and Family Welfare (MoHFW) ajanga amenokba Integrated Health Information Platform (IHIP) ya

web based near real-time information system ka lir, koba agi tashidak poktetba ketdangsüsü asoshi geospatial information den 'state of the art single operating picture' osangtem agütsür.

IHIP indang tongtipang inyakyimji mobile application amshia real time data reporting; yimtsüngtem nung amshitetba, state aser central level nung, health facility tem indang geo-tag süa osang agütsüba, advanced data modeling aser analytical tools amala alitsü.

National-Level nung nüburtem temang anepaluba mapang temai madokdaksüi amshiba health data/record tem tajungtiba nung ketdangsüsü,

tashidak tajungtiba nung putettsü, shirangertem mozüki tanaben semdangba ajemtsü aser medical tsütsü aibelen nungi nokdangtsü, teyari tajungba agütsüsü nükjidong nung iba sentong ya tenzük.

Iba training nung shisalen sayurtem ya Dr. Tiasunep, DVBO/DSO, Dr. Akumtemjen, Epidemiologist, Bendangtemsu, DPM aser Toshimeren, BPM nungertem liasü.

Training agirtem ya Mokokchung district kübok aliba block ajak nungi PHCs, CHCs aser BPMs nungi SMOs, MOs, CHOs, Office Assistants den Pharmacist aser Lab Technician tem liasü.

'Her&Now' ajanga Nagaland nung tetsür Entrepreneurs nem teyari agütsür

Dimapur, Metsüremi/March 18 (TYO): Zakietsono Jamiraka Atsi ya Medziphima nung amendaker aliba Farmer Square Café ngutetla aser kibur lir. La den teyariteper 4 den parnoki freshly ground coffee customer tem nem agütsür. Iba den bendenloksema parnoki pickle, sauce, konger, jiru pongdang nung seper agütsür.

Zakietsono mapa tenzükba sülen tia tensa aika ajangshia aruogo. Tanur asündang nungi lai la meyong langka tenzüknüa liasü. La Catholic Institute, Nagaland nung school azüng aser iba sülen Literature nung Bachelor's Degree agi. Ajisüaka taimaka kibong nung senotsü timtem aliba ajanga züngtur anen. Ajisüaka iba ajanga la temulung atema maküm aser temulungtetba tulu aliba ajanga tia tensa ajak ajanger la indang business tenzüktet.

2017 la local workshop ka nung aden aser beans nungi coffee brew asütsü angazük. Iba ajanga la kanga ajungmeso aser coffee dak sendakba nung tali bushitsüngdangba sülen business tenzütsü asatet.

"Coffee amshiba yimya tendangba ajanga kü tejangraba

tali jangrudaksü. Iba ya temulungdang yur ni Farm Square Café ta nüngja agütsür business ka tenzük. Ni timtem tekangshi aika ajangshio, ajisüaka tanübo 'coffee' ya kü maitüsü kumogo, ta ni nema tanga shiteter aser iba ajanga taküm nung timtem tulu kar ajangetogo. Ni renloka aoba den kü sasa ni tali angatet aser kü mapa tali meima aküm, ta Zakietsono-i ashi.

Atsi-i iba mapa 2018 küm tenzük saka senotsü nung tetsükdaksü adokba ajanga ita ishika lir shibang. Ajisüaka toktsütsü melenai lai la tajangshiba nungi angazüka tenüngdakba resource tem benden aser 2019 küm November ita Farmer Square Café amenok.

La German development cooperation agency Deutsche Gesellschaft für Internationale Zusammenarbeit (GIZ) GmbH-i achaayangba Her&Now support programme nung taoba küm aden aser iba ajanga la business jenjang tajungba ka dangi ajungketogo. Iba indang jembidang Zakietsono-i, "ni kü indang business model aser shishilembaba yimya mejangjai

liasü. Iba project support programme nung adenba ajanga kü nem teyari agütsüogo. Her&Now nung adenba ajanga tesendaktep, business tasa atsülangshiba nung teyari agütsüogo," ta ashi.

La enterprise ajanga Zakietsono-i temeket nung aliba tetsürtem nem sen aatsü lenmang lapoktsüogo aser iba den lanurtem aluyimba nung shilem agütsü ajungshir. La ya Medziphima nung "quality coffee culture" bener arur mezümpur lir aser la dang "Coffee Lady of Nagaland" ta ajar.

North-East nung state balala nung GIZ's 'Her&Now'-i teyari agütsüba tetsür entrepreneurs 150 dak tema nung Zakietsono-a ka lir. 'Her&Now' ya Government of India's Ministry of Skill Development and Entrepreneurship den longjemer German Federal Ministry for Economic Cooperation and Development (BMZ) tenüng nung German development cooperation agency Deutsche Gesellschaft für Internationale Zusammenarbeit (GIZ) GmbH-i India tesem balala nung tang tinyakdak project ka lir.

State Level Appellate MCMC tentetogo

Dimapur, Metsüremi/March 18 (TYO): Nagaland Legislative Assembly nung 51-Noksen (ST) Assembly Constituency nungi tazüng ka adokba süngdaksütsü asoshi bye-election sangdongba nung ajemdaker State Level Appellate Media Certification and Monitoring Committee (MCMC) ka yamai shimteter:-

(1) *Chairman, Abhijit Sinha, IAS, Chief Electoral Officer, Nagaland.* (2) *Member, One Observer appointed by the ECI* (3) *Member, Z. Tokishe Sema, Director, Information & Public Relations* (4) *Member, K. Sonikumar Singh, Assistant Director, PIB Kohima* (5) *Member, Alice Yhosu, Journalist & President of Kohima Press Club* (6) *Member*

Secretary Ruokuovituo Khezhe, Jt. Chief Electoral Officer, Nagaland State Level Appellate MCMC ajanga mapa ana inyatsü:

I. Commission totuyuba No.509/75/2004/JS-I Dated 15th April 2004 nung shia aliba ama Certification of advertisement indang nung District aser Addl. CEO Committees ajanga benokba nung telemtetba agütsü
II. Paid News nung District MCMC ajanga telemtetba agia aliba ajunga mesüra soumotu nung ken o benokbatem asadangtsü, aser item ken o ya candidate nem sangoktsütsü asoshi ROs nem totuyuba agütsütsü.



Department of Social Welfare Mon ajanga March 16, 2021 nü Mission Compound, Mon nung Poshan Pakhwada & Plantation of Medicinal Plants Programme sentong ka ayongzüba mapang SDO (Civil) Mon, Ilika Zhimomi, NCS ajanga medicinal plant atemba noksa nung angur. District Administration, H&FW, RD- NRLM, PHE aser AYUSH department tem lungjemer Poshan Pakhwada ya district nung March 16 nungi March 31, 2021 tashi amungtsü.

GPRN ajanga asükhu lemsateper

Dimapur, Metsüremi/March 18 (TYO): Lotha Region kübok Akuk yimtsüng nungi NSCN/GPRN nung Leacy, Nghao Kikon anojungi March 17, 2021 nü asüba atema Government of the People's Republic of Nagalim (GPRN) ajanga mang ayimer. Pa Naga linük tenzükba wadang nung 2006 küm tenüng zülüok, ta MIP, NSCN/GPRN sangdong ka ajanga ashi.

Pa anokshitsü makokba linük meimba molungsentsü nung tasünü tashi Naga linük tenzüka liasü.

Pa asüba ajanga tawa adokba jangja-jangja metettsü

aser iba tawa asüngtsü kanga tasak alitsü. Pai Naga lima asoshi anibelem mesasai tenzükba atema pa tenung Naga nunger puti otsü nung teti alitsü aser Naga lima asoshi bendanga agütsüba ajak molung nung teti alitsü, ta sangdong ajanga ashi.

GPRN ajanga asür Nghao Kikon'er kinunger aser tembartem den asükhu lemsateper aser parnok temang nung tashi aser anisüngzük molungsentsü agüjang ta sarasademtsür. Maneni asür tanüla teti tatem maka tesunep nung anisüngzükjang ta sarasademtsür, ta kasa sangdong ajanga ashi.

Longleng nung taxi/bus taa yanglushi

Dimapur, Metsüremi/March 18 (TYO): Taxi/Bus taa asadangshitsü atema DC Conference Hall, Longleng nung March 16 nü senden ka menogo.

Iba senden ya ADC Longleng, D. Robin lenisüba kübok agia liasü. Ken o balala benoka asadangba sülen teküboklen agüja aliba onüktem lemtetogo:

(a) Taxi/bus taa tang nungi yamai alitsü:
(i) Tata Sumo - Longleng nungi Dimapur - Rs.700/-
(ii) Tata Sumo - Longleng nungi Kohima - Rs. 750/-
(iii) Bus - Longleng nungi Dimapur - Rs. 500/-
(iv) Tata Sumo - Longleng nungi Mokokchung - Rs. 400/-
(v) Tata Sumo - Longleng

nungi Tamlu - Rs. 350/-
(b) Gari junga anepalutsüji taxi/ bus kibur khuret asütsü aser mapang shia asadanga alitsü. Nüburtem lendongi idaktsütsüsa gari junga anepalu masüba gari kiburtem nem temerenshi agütsütsü.

(c) Gari tashi dak alia nisung aser khu abenba nokdangtsü. Passenger tem khu seret 10 dak tema masütsüla aser iba inyakyim ya kanga sashia benoktsü.
(d) Temesepba chiyongtsü chia jemer gari anishirtem merenshitsü.

(e) Tenokdangba agütsür aliba oset shibelenba nokdangtsü. Iba tetuyuba sülen manidakertem temzüng özüng kübok merenshitsü.



Poshan Pakhwada 2021 nüngtem nung Social Welfare Department (ICDS) Tuensang-i, March 18 nü Government High School Hakushang nung tinlonglong aiür chanutem atema Anemia Screening Camp ka ayongzüka katsüogo. Camp mapang Thungpang-i Poshan Pakhwada indang metetdaksü aser Tsungrenla Jamir, Drugs Inspector aser Dr. Mongko Chang MO (RBSK) nati "Anaemia" onük nung ajemdaker jembi. Camp nung tetsür 195 screen süa liasü.

Arunachal mi lendong nung nisung 2 rongset

Itanagar, Metsüremi/ March 18 (Agencies): Brehostibarnü Arunachal Pradesh, Tirap district kübok Longliang yimtsüing nung mi adokba sülen arishi küm 6 tanur ka densema nisung ana rongsetogo. Ketdangsertemi ashiba agi, lendong ataloker aliba tesem nung tensa kanga junga asadangba sülen asür timba akümtsü akok.

Ketdangsertemi ashiba agi, iba yimtsü nung nikongtsütsü 1 ako shi nung mi adok aser ki 83 mitsü kuma rongtok.

Longliang koba Lazu circle küboki aiter iba

yimtsüing ya Tirap district headquarters Khonsa nungi km 45 shi pilar lir. Iba yimtsüing ya India Myanmar arrtsü nung yimtsüing tatembangbuba lir.

Mi adokba kuli tang tashi mejangja, ta ketdangsertemi ashi.

Lazu extra assistant commissioner D K Thungdok-i iba tesem tonga oa tensa asadangogo aser osang agütsüba mapang tashi nung Tirap deputy commissioner Taro Mize aser Karda Kabak nati iba tesemi aoba osang angazükogo.

Chief Minister Pema

Khandu, shiba tang Sikkim semdangba mapang lir, pa nema iba lendong osang agütsüogo, ta ketdangsertemi ashi.

Iba mi lendong ya Longliang yimtsüing nung 12:45 shi nung tenzük aser yimtsüing kanga kinük nung aliba ajanga mi temseptsü atema fire tender ka danga meyokteti liasü, ta Tirap deputy commissioner Taro Mije-i ashi.

"Yipden nungi mesakteti shiranga aliba nisung tainka aser tetsür chanu ka rongsetogo. Asür tem maitsü mejangja," ta ketdangerisa shisem.

Congress-i 'Congressor 5 Guarantee' ken sayaogo

Guwahati, Metsüremi/ March 18 (Agencies): Assam in charge, AICC general secretary Jitendra Singh-i Brehostibarnü Rajiv Bhavan, Guwahati nung party indang official 'Congressor 5 Guarantee' campaign ken sayaogo.

Party-i iba ken ajanga Assam nung aliba nüburtem dang 'Congressor 5 Guarantee' ajanga state nung yimjung bener arutsü nükla aliba pusemtsü mepeshir.

Iba ken ajanga mapa mongui aliba lanurtem nem mapa agütsütsü nangzük, kechiyong Congress-i küm nung mapa lakh kaka agütsütsü nangzükogo.

Ken ajangsa süngolu nung inyakterem tepela indang atener, kechiyong parnok nem anogoshia taasen 365 agütsütsü nangzükogo.

Maneni ken ajanga tetsürtem tashi indang jembir. Congress-i tetsürtem nem kibong nungittsü atema ita

nung sen 2000 agütsütsü nangzük. lir.

Ken nungsa Assam nung jila aser yimtsüing ajak indang tensema lir, koba state nung kibong ajak nem electricity unit 200 angati agütsütsü Congress-i nangzükba sayur.

Ken tatemi, Congress shimba ajanga CAA anema ozüing benoka nüburtemi oshi, sobaliba aser meraket wazüka ayuba nung Congress nem teyari agütsütsü ta shia lir.



23 Sector Assam Rifles, Serchhip Battalion-i Mizoram, Champhai district kübok Zokhawthar yimtsüing nung bendanglen nungi shibelener aruba cigarettes case 10 puogo. Cigarettes tem ya sen lakh 13 alang liasü.

Manipur: kaketshir 4 dak COVID-19 tashidak potet

Imphal, Metsüremi/March 18 (Agencies): Manipur, Noney district kübok Nungba sub-division nung St John's School hostel nung alir kaketshir pezü dak COVID-19 tashidak potet.

Official osang ajanga ashiba agi, traced contacts 43, kong St John's School nung azünger kaketshir 39 aser tesayur pezü densema lir, parnok ka dak danga tashidak meputet. Ajisüaka item

kaketshir pezü tashidak menar aruba tera tang tashi mejangjai lir.

Noney chief medical officer Edwin Golmei-i ashiba agi, kaketshir pezü dak Nungba CHC nung March 16 nü COVID-19 tashidak poteta liasü.

Dr Golmei-isa, Mongjaron Khunou nungi kaketshir agi tua nisung 10 shirnok dak tashidak potetogo, parnok dak COVID-19 tashidak keta aliba temaitsü

sayu tenzükdar.

Dr Thaimei Gairanlung-i anir district surveillance officer ka densema Rapid Response Team ka iba yimtsüing ogo aser COVID-19 dak sendakba nung kechi jenjang agitsü tim item jenjangtem ajak agiogo.

Ajsüaka medical team nungi tang tashi osang kecha mongui lir. Noney district nung tang tashi nungbo nisung pezü dak dang COVID-19 tashidak poteta lir.

ECl election Observer asütsü Devajyoti Hazarika shimogo



Guwahati, Metsüremi/ March 18 (Agencies): Election Commission of India (ECI)-i state pongu; Assam, West Bengal, Tamil Nadu, Puduchery aser Kerala Assembly elections General Observer asütsü atema Commissioner of Guwahati Municipal Corporation (GMC) Devajyoti Hazarika shimogo.

Sikkim nung aonung curfew benokogo

Gangtok, Metsüremi/ March 18 (Agencies): Anogo ishika tsüngda COVID-19 tashidak poteter tali akümba sülen Sikkim sorkari aonung curfew benoktsü atema telemtetba agiogo.

Night curfew ya Brehostibar aonung nungi Sikkim ajunga nung benoktsü.

Iba osang ya Sikkim Chief Minister PS Tamang-i sangdonga liasü.

Aonung curfew ya 10:00 ako nungi benoktsü. Restaurants, bar, disco, pub aser gym ajak state ajunga nung aonung 10 ako nungbo shibangtsü.

Kasa mapang nung aonung 10:30 sülenbo state nung gari senzusenpong mesüdaktsütsü.

Sikkim CM PS Tamang-i state nung aliba nüburtem dang mapang ajak nung mask asemtsü aser COVID-19 inyakyim dak ajemdaker

Devajyoti Hazarika ya Assam-Meghalaya cadre IAS officer ka lir aser pa India temzüing ozüing kübok arrla 324 nung ajemdaker state 5 nung Assembly elections General Observer asütsü shimogo.

General Observer asütsü atema Devajyoti Hazarika shimba tetuyuba ya Bodhbarnü agüja liasü.

General Observer, ama Devajyoti Hazarika-i Election Commission kübok election dak sendakba nung inyakyimtem achaayangtsü.

Assam, West Bengal, Tamil Nadu, Puduchery aser Kerala nung assembly election March 27 nü agitsü renema lir.

State pongu nung vote May 2 nü azüingtsü.

inyaksangshi ajak tetsüngda ita inyakhitsü mepeshia metetdaktsüogo.

"Ni Sikkim nungertem dang mapang ajak nung mask asemtsü aser tashidak nungi kümzüka alitsü atema COVID inyakyim sülen anidaktsü aser lokti nung tetsüngda ita inyaksangshitsü mepeshir," ta PS Tamang-i ashi.

"Maneni onoki Restaurants, Bars, Disco, Pub, Gym amala densema aonung 10 ako nungi curfew benoktsü telemtetba agiogo aser kasa mapa nung garitem 10:30 sülenbo senzütsü memelatsü," ta CM Tamang-i shisem.

PM CM Narendra Modi den chief ministers tem linük nung tawa COVID-19 tashidak tali prokshia aoba asadangtsü atema video conference ka agiba nung PS Tamang shilem agiba sülen Sikkim sorkari iba tetuyuba agütsü.

CPI lenir tejen Saifuddin süogo

Lakhimpur, Metsüremi/ March 18 (Agencies): Assam nung CPI lenir tejen Saifuddin Ali Hazarika Brehostibarnü North Lakhimpur nung par kidang süogo.

Arishi küm 75 tain CPI lenir ta communism den sendaktepa aliba ajanga 1970s mapang USSR, Poland aser East Germany (DDR) tashi oa international politics aser governance nung shilem agia liasü.

Maneni pa 1991 küm Lakhimpur Lok Sabha constituency nung parliamentary elections nunga toktepogo.

Saifuddin Ali Hazarika ya lokti nung oa kanga junga jembitetba atema aikati jangjaa



liasü aser pai North Lakhimpur nung lokti tentet balala nung tongti shilem agia liasü.

Hazarika-i kinungtsü, jabaso ka aser jala ana toktsür iba lima nungi pilaa ogo.

Pa tasü mang Hokolbarnü intoktsü.



TIR YIMYIM YIMOBILEM (EDITORIAL)

DIMAPUR ROGONÜ, METSÜREMI (MARCH) 19, 2021

SENSO REGISTER

Nagaland nung senso jangjatsü aser bendangertem aruagi senso kuma melidaktsütsüsa nokdangtsü atema Nagaland government-i taoba kum ana tsüngda telemtetba tasak saka tajung ana agia lir. Telemtetba ana rongnung kaji, Nagaland senso jangjatsü atema Senso Register ka lapoktsü aser iba dangji Register of Indigenous Inhabitants of Nagaland (RIIN) ta ajatsü aser tanabuba telemtetbaji, Dimapur district ajunga nung tanga district-tem nung ama Inner Line Permit (ILP) amshitsü. Iba telemtetba ana ya kodang mapa koma odir, iba jagi Nagaland nung alir Naga nung senso dang masü saka Nagaland nung 1963 kum December ka tashi nung Nagaland state nung aruagi senso kuma alirtem ajak ajangzüksü aser bendangertem aruagi Nagaland amokseptsüba lendong nungi kumzüksü. Ajisüaka, telemtetba anaprongla ya o agibo melamelaa jembir saka mapa kuma inyaka aotsü temelabo masü, ibayongji telemtetbabo agi saka mapa kuma meinyaktet ta tang tashi o agi mapa mekümtet lir. Iba jagi nübortemi matateter aser iba tejashiji sayua tanü Dimapur nungbo Joint Committee for Prevention of Illegal Immigrants (JCPI) teloki anir lokti senden ka alitsü aser iba sülen Deputy Commissioner ajanga state government nem parnoki lemteta akaba telemtetbatemji yaktasa mapa kuma inyaksü asoshi takangba agütsütsü. Atangji, RIIN aser Dimapur nung ILP amshitsü atemaji nübortemi tasensa akanger masü saka government-i lemteta akabatam yakta mapa kuma inyakang ta akangerba dang lir, anungji ibaji atemabo nübortemi akang matai yakta dang mapa kuma inyaksüla. Taoba ita nunga JCPI teloki RIIN dak aketba ken o ya tatar senden nung benoka jembitsü asoshi takangba agüja liasü, saka mejembii süidaktsüogo. Atangji, English agi "Indigenous" ta asüba ojang ya kodang meyipdangdir "yimkümer, yimputsür Yimpur" ta angatetter, anungji Nagaland government-i Nagaland senso asütsü atema 1977 kum telemtetba ka sandongba nung, nisung shiba 1963 kum December ka tashi nung Nagaland nung ali-kimong kümteta lidir mesüra 1963 December 5 nü mezüng Nagaland electoral roll adokba nung tenüng lidir, parnokji aser parnok chirnurtemji Nagaland nung "Indigenous" nisung asütsü ta alibajiang tera mapet asütsü. Ibaji kodang asenoki bilemdangdir, senso aser yimkümer naji balala, kechiyong yim ka nung alir ajak senso asütsüa akok saka ajakbo yimkümer masütsüa akok, anungji kodang asenoki 1963 kum December ka tashi nung Nagaland nung arua senso kuma alir ajak yimputsür yimpur kümdaktsüdir, iba jagi tarutsü nung tetsüdaktsü adoktsü. Aji oda, asenoki angatettsü agi, Dimapur nung Marwari aser Bengali nung aiki 1963 kum December ka tashi nung pei ali kimong kümteta alir aiki lir. Iba amaji Kohima aser Mokochung nunga Nepali nung karbo alitsü. Item ajakji 1977 kum Nagaland government telemtetba ajanga Nagaland senso kümdaktsüogo saka parnokji Nagaland nung yimputsür yimpurbo masütsü. Iba kasaji Nagaland sensotem rongnunga tanur asüdang nungi mesütetba agi, mesüra tetsü Nagatsür asüba agi, mesüra kidangi anir arua pei chir kuma tebu jadaktsüba agi Naga nung senso kümer aiki lir, saka parnokji Nagaland nung yimputsür yimpurbo masütsü. Itemji kodang mebandangteti ajakji kasasa Indigenous Register nungji zülüokdir, mapa aiki nung yimputsür yimpurtemsa akoksatsü. Atangji, asenokbo US tashi nung oa senso akümtsü saka asen Nagaland nungbo shinga senso mekümdaktsütsü ta masü saka mapa agi langa lira bendanger agi Nagaland senso akümtsüa akok, iba jagi maparen aiki nung Nagaland ajangzüksü. Ajisüaka, yimten aser lokti nung maongka aser mapa mashi merakteptsü atema senso register nung zülüoka alirtem rongnunga senso tapu anaji bendangtetsüsa telemtetba kar alitsüla. Atangji, tang ya alima ajunga nung pei senso temeten wazüka ayutsü merangba mapang lir, kechiyong alima alushibo tuluba makümer saka nütsüngbo züiner. Iba ama mapang ka nung asen lima ama sensosanger o bendanger na mebandang aliba limatem ya bendangertemi melamelaa amokseptsü. Tanga, joko, Dimapur-bo Naga nung lima memesük kumogo, kechiyong ango an aser aonsutsü nungi shir osettsüset aser süoshi ayoker aser mapa inyaker ajak yashi arur tsümartem agi sünga lir. Itemji Nagaland-i marudang, tamasa, par lima nung Nagamese jembitsü angazüker arur. Item ket nungji ILP a mali, kechiyong telemtetba liaka state government-i ILP özüng ya mamshitetter. ILP özüng amshitsü atema gari aser train aruba süngküm ajak nung mitkar alitsüla aser Nagaland-i marudang ILP online nung agizüktettsüsa inyakyim maneni alitsüla. Atangji, Nagaland-i shinga marutsü ta masü saka temelaba meshir teti atema masü saka mapang tatazük ka atema arutsü melatsüla. Item nisungtemji kisür jensür aser alu aser school nung inyaksü pur süra 'ILP den Work Permit' agütsütsü aser tangartem nem pei mapa dak apet ILP agütsütsü. Iba jagi Nagaland senso jenjang bentetshitsü aser bendangertem ket nungi Nagaland kumzüksü.

OLEMSABANG

HORNBILL FESTIVAL AMUNGBA INYAKYIM ASER NUNGJA YA MELENSHI NUNG KODA???

~ L. Kika Pongener

Lenir Wati Longchar (Serampore)-i Hornbill Festival (Tenem Ozü Benjong) amungba yagi shiba ajangzük ? ta 26th February nungi 3rd March tashi Tir Yimyim olemsabang nung züluba ocet nungi tazüngertem aiki tajangzük nguogo ta amanger, nia kanga tajangzük nguogo. Lenir-i züluba ama, tanü putu nung Tourism ya linuk ka rongsenketzüng renloka tejakleni aotsü atema kanga tongtipang Industry ka kumogo. Linuk ka sobaliba (culture), tamangba, rongsenketzüng, shisaliok, aser yimten yimli, itum nung yimsoshitsü aser tangar linuk den jangyu medema aintsü atema Tourism ya tongtired ka lir. Asen Naga lima-a alimai memeteti aliba, talisa asen India nung-ia dena ajakibo mejangjai aliba, iba Hornbill Festival amungba ajanga alima rangben 'Tourism Map' nung ajenloktsüsa maongka angü, aji oda, tanübo alimai asen Naga lima meteta kumogo. Ajisuaka, ano iba Tourism Industry yagi mekümdangra linuk dangi tenungmenuk aser takoksa jenti bentsür arutsü. Aji oda, inyakyim shitak meinyakra iba Hornbill Festival yagi takartem (capitalist) kar dang tajangzük angutsü. Anungji iba Hornbill Festival ya nuktapangda japojari aser chidiyungdi jatetdak benjong ka masütsü, saka tajangzük akaba mapa ka asütsüsa inyakyim kanga junga asameyanga inyaksüla. Kanga tesasatsü-ka, otsüla-oboula nungeri Dr. Clerk-i bener aruba Khristan yimsu mezüng agizükdang, tera aibelena tamang yimsu o sobaliba na mebandang meyokteper agizükba ajanga, asen sobaliba tajungtem aiki temenen ama ashibang, aser sobaliba nungshi oset aser subosolemtsü tajung endoka-adok aser mi agi rongdokba otsü lir. Ibajagi asen sobaliba tajungtem aiki tanem-tanemi samaa oya-a aliba, iba Hornbill Festival amungba ajanga Naga nung kin shia sobaliba tanaben asüngsashitsü/yimsoshitsü maongka tajung ka bentsür aruogo. Ano asen Naga lima ya linuk tilaka dang sernung, Naga nung kin o kin tsüngda nunga, kin kati kin ka sobaliba junga mejangjai pei pei atsükbanger lia aliba, iba Hornbill Festival amungba ajanga kin kati kin ka indang sobaliba tali tejangjaba nung meteta (recognition) kumogo, aser kati ka den sendaktepa sobalibaa alitsü angazüktepa odagi. Atangji, asen Naga nung asoshi Hornbill Festival amungba tajangzük tulutibaji aji ka asütsü.

Tenem ozü (Hornbill) ya ashiko akhi mapangbo asen Naga lima nunga bulua ngua aliba ozü ka liasü. Ajisuaka, asen Naga nung dak tashimait tulutiba kaji arem shiruru wazüka ayutsü melena, kahseta/tepseta achiba ya tanü tashi memelenshiteter, ibajagi tanübo iba 'Tenem Ozü' ya asen lima nung samaa odagi. Ashiko asen Naga lima dang nungibo asen kidanger state Arunachal Pradesh nungang kanga agi teimba alitsü sudi. Tenem Ozü (Hornbill) ya Arunachal Pradesh sorkar meyong maittsü (identity/sympol) ozü ka ta angazük. Anungji iba Hornbill benjong nungja ya arunachal nung atema-ang tapetba asütsü ta bilemer. Asen Naga lima nung, kanga tia kaa tanga lima aiki nung kangarabo bulua maliba ozü ka, 'Tragopan' ozü ya asen Naga lima nungbo angur. Iba Tragopan ozü ya ozü rongnung tobur kanga tajung, alima kin aikati sapua meimba/nukshiba ozü ka lir. Atangji, iba ama tobur tajung nungtokü ozü (Rare Pets) ka, asen lima nung alibaji asen Naga nung atema konang aser rongsen tulu lir. Anungji iba ozü ya asen Naga nung atema 'Nungshi Oset' ka ama züngshitsüla aser wazüka ayutsüla. Aji oda, iba tobur tajung nungtuko ozü ka asen lima nung alibaji alima nem metetdakja (Advertise), iba 'Tragopan' ozü tenung jalokja, 'Hornbill Festival' ta nungja ajaba melena, 'Tragopan Festival'...ta nungja-ji (Name of the Festival) aja nungang kanga agi tajungba/tapetba asütsü sudi ta bilemer.

Ano aji dang masü, iba Festival ya Naga nung kin shia sobaliba benjong den külemi repa mamungtsüla. Aji oda, iba Festival ya tang amungba yayim nung, District shia nung pei kin 'Sobaliba Benjong' (Traditional Festival) den külemi repa mungra, iba Hornbill Festival yagi tanem-tanemi Naga nung kin shia 'Sobaliba Benjong' ya mokseptsü aser samaa odaktsütsü sudi ta tsübuseta bilemer. Anungji kokrabangla iba benjong ya tang amungba yayim nung masü, saka inyakyim ya tera melenshi nungang tajungba asütsü ta bilemer. Tat. agi... kum shia Mokochung jila nung Aor 'Moatsü' & 'Tsüngrem-mong' benjong den külemi repa Hornbill Festival amungba yagi asen sobaliba benjong, otsüla-oboula nung mapang nungi anemponga, metsüngareta, ashiteta munga aruba benjong ka, tanü putu nung puratetba benjong ka den külemi repa amungba jagi tera pongpa-pongpa kümdaktsür, aser kopi meli-ia iba Festival yagi asen kin sobaliba benjongji tanem-tanemi mokseptsü kecha meteta maka. Kechiyong, iba Moatsü & Tsüngrem-mong benjong yabo longso-longben benjong ka dang masü, saka tsüngküm-mungpo tsüdanga, aki-alu ayimba mapa nung Tsüngrem dang temoatsü meshia aser tenungsang agüja anemponga amungba, tetezü tulu aketba kanga tongtipang benjong lir. Ano aji dang masü, iba benjong mapang nung asen den akhi tsürabur mapang nungi akang-jongshitepa lia aruba kintem aser kidanger/kiyonger yimtsüngtem 'Anja' jaoka metsüngareta amungba benjong lir. Aji oda, tang amaisa munga ora shibai metet, iba Hornbill benjong ya lanur putu nungbo, Naga nung kin shia sobaliba benjong dang nungi kanga agi tongtipangba akümtsü. Anungji memenu dang iba 'Hornbill Festival' District shia nung kin shia sobaliba benjong den repa amungba yabo melenshi nungang tajungba asütsü. Kokrabangla, tang amungba yayim melena December 1-10 tashi nung Hornbill benjongji, Naga lima District ajunga nung anogo/mapang kasa nungji külemi amungba kanga agi tajungba asütsü, kechiyong Naga nung kin ajak kum shia teshimtet nubu, pei pei yimtsüng nungi Kohima-i arutsübaji timtem/khuret tulu aser senotsü-a aikasa endoker. Anungji Hornbill Festival amungtsü nungdem nung Kohima-i arutsü melena, pei pei District Head Quarter nungang amung nungbo mapang aser senotsü a aiki kumzüksü. Ano aji dang masü, iba benjong mapang tanga lima nungi bendanger (Tourists) arurtem atema-a District ajunga nung külemi amungbajisa tajungtiba asütsü, Anungji iba Hornbill benjong amungba yayim tang District shia nung kin shia sobaliba benjong den repa amungba melena, anogo mapang kasa nung District ajunga nung külemi meja-meja iba Hornbill Festival ya dang amungtsüla, aser kokrabangla iba benjong nungja (Name of the Festival) ya 'Tragopan Festival' ta melena aja nung koda (?)...ta arok külemi shisadangtsü atema lemsateper.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger agateta agitsü mepishir**

Myanmar nung Khristantemi longkak aitba nung shilem agir



February 10, 2021 nü Myanmar kübok Pathein nung Khristan putirtemi State Counselor, Aung San Suu Kyi noksa amer temeyong asem salem agüja longkak aitba nung shilem agiba noksa nung angur.

March 18, 2021: February 1, 2021 nü Myanmar nung sepaitemi democracy lenirtem apuba sülen nüburtemi longkak aitba nokdangtsü atema sepaitemi tashiyim amshiba anema alima tesem balala nungi Khristantemia ola adoker.

Myanmar nung sepaitemi State Counsellor, Aung San Suu Kyi den lenir 20 dak tema apuba sülen sepaitemi linük nung emergency sangdong. Myanmar linük temzüng Arrla 417 ajanga emergency mapang nung tashi amshia yimsüsütsü atema sepaitem nem tashi agütsür. February 1, 2021 nü Parliament tenzüksü ghonda ishika dang lia anepdang züngia sepaitemi lenirtem apu. Küm ka emergency tembangba sülen ang sepaitemi election ayongzüka agitsü, iba sülen takok angurtem nem yimsüsüba menden agütsütsü.

Tang Myanmar nung tensa mejungi aliba mapang ka nung nütsüng kanga ajema aliba Khristantem koma lir, ta Khristan aikati shisabulua bilemtsür.

Myanmar nung Khristantem ya 'second-class' sensotem ama züngshir aser Khristan yimsü amangertem nem maongka aika magütsür, ibayongji linük nung

Khristantemi külem tamangertem dang longkak aitba nung shilem magitsüla, kechiyong tashikartem tsüngda raradang asenok ang takoksa angutsü, ta ajungshiteper.

Ajisüaka tawa linük nung sepaitemi tashi amshia sorkar atsüngdokba sülen nüburtemi longkak aitba nung Khristantema aikati shilem agidar.

Myanmar kübok Kachin aser Chin lisopurtem shilem 90 dak tema Khristantem lir, iba denji külemi Karen aser Kachin nunger raraba hadir aliba telok aika lir, ibayongji Myanmar nung sepaitem anema raratsü atema nüburtemi parnok dak imlar.

Chin nung Khristantem densema state balala nung aliba Khristantemi tang Myanmar tensa atema sarasademtsüba atema linük nüburtemi Khristantem dang pelar. Chin nunger Khristan, Salai Maung Taing San (Dr Sasa) ya tang UN nung Special Envoy of Committee züngsem lir, aser tang pa leniba nung sepaitem anema nokdaker.

February ita tetenzüklen nüburtemi longkak ait tenzüka mapang nung Myanmar Baptist Convention (MBC)-ia sepaitemi tashi amshia democracy

lenirtem apuba atema aitsüba den külemi lenir, Aung San Suu Kyi aser Tir, U Win Myint na chioktsü takhangba agüja liasü.

February 12 nüa MBC-i sangdong ka ajanga Khristantemia Civil Disobedient Movement (CDM) pusemer, ta metetdakja liasü.

Parnoki iba sangdong agütsüba sülen Arogo aikati züngsemtem dang CDM nung shilem agitsü ajungshiba den külemi teyari agütsür.

Ano külen Arogo züngsemtemi pei Arogo nung pastor tem dang parnok amai yimti yimdongi arua longkak aitba nung shilem agitsüla, ta ayongzüker.

MBC-isa longkak aita yimdong süa jajatsü atema lanurtem ayongzüka liasü, saka police aser sepaitemi nokdang. Ajisüaka MBC-i parnok indang compound nung longkak aitba sentong ka ayongzüka agiogo.

February 18 nungi tenzüka sepaitemi longkak aiteritem nokdangtsü atema tashiyim amshir; tang anogo shia nisung 500 shi apur aser nisung 180 dak tema khasetogo/tepsetogo.

Khristantem aika puogo saka Khristan lanurtemi maneni pei taküm bendanga agüja longkak aitba nung shilem agidar.

Lifeway Research nung executive director, Scott McConnell-i, "America nunger sobaliba ya puti Khristan yimsü dang nungi tangatetba balaka akümer. Tesayuba shidak agütsür pastor temi sayuba aser sobaliba tsütsü nungi tesayuba agütsüba naji khenyongi balala," ta metetdaksü.

Iba survey nung pastor tem dang, "Nisung kati pei tasodang Tsüngremi lezmüksüba ama masü saka tetsür-tebur melenbaji tai asü?" ta asüngdanga liasü.

Baptist Pastor shilem 94-i tetsür-tebur melenbaji tai ta bilemer

March 18, 2021: Evangelical pastor tem aikati, tebur ka mesüra tetsür kati kati surgery agia tetsür/tebur akümbaji tai ta bilemer, ta Lifeway Research survey ka ajanga bushitet.

Iba survey nung pastor 1,007-i shilem agia liasü.

Evangelical pastor aikati Tsüngremi lezmüksüba anema nisung kati surgery agia mesüra hormones agia tetsür-tebur akümbaji tai ta bilemer; Evangelical pastor shilem 90-i ibaji tai ta bilemer aser mainline pastor shilem 37-i ibaji tai ta

bilemer, ta survey ajanga bushitet.

Protestant pastor tem rongnung shilem 77-i surgery agiba ajanga tetsür-tebur küma melenbaji tai ta bilemer, Pentecostal pastor shilem 96 aser Baptist pastor shilem 94-i ibaji tai ta bilemer, ta survey ajanga bushitet.

Christian/Church of Christ pastor shilem 75, Lutheran pastor shilem 69, Methodists pastor shilem 48 aser Presbyterian/Reformed pastor shilem 49-i ibaji tai, ta bilemer.

ANO GO ABEN TSÜNGREM DEN

KECHIBA TAJUNG HOKOLBAR

"Temenen nungi pila-a asenok sür külen temeshiba atema taküm alitsü asoshi pai pei sasa kangki nung pei temang nung asen menen aben, aser pa tazükba zübu agi asenok aneb." (1 Peter 2:24)

Kechiba Good Friday ya tajung ta ashir? Iba anogoji kodang bushidangdir Yisu Khrista rishikangshi tulu ajurur kelen ano kangki nung ashir-aour yimya nung angenloka südaktsü. Iba anogo nung pa nütsüng ter-ana agi pa sentokba mapang ka liasü, pa dak metzü metsüloktsüba anogo, ai korang semtsüba anogo, aser talisa Tebui pa doktsüba anogo ka liasü. Iba ama anogo ka dang kodaser tajung anogo ka ta ashir? Kechiaser, tajungji Pa asoshi masü, saka asenok asoshi liasü. Iba anogo ka dang kodasür tajung anogo nung Yisu Khrista koba tasüba ahuru aji asen melen pa kangkitong nung asüba liasü. Asen matsütsü melen pai maksü ajak arem. Na/ni asemtsü melen pai ai korang asem. Aji na aser ni asoshi tajung masü na? Hokolbar nü asen Kümtetdakba Yisu Khristai kechi asenok asoshi tajung inyak aji aseni tajung inyakba yong masü, saka Pa taochi yong lir. Iba Hokolbar nü kechi Yisui inyak aji asenok tekümtet asoshi liasü.

SARASADEM

Kü kümtetdakba Yisu nai ni atema kechi inyak iba asoshi ni ne dang pelar. Amen

N. Ireland nung Good Friday (April 2) nungi Tenla kitem lapoktsü

March 18, 2021: Easter Sunday atongtsü jelia Northern Ireland nung Tenla kitem tanaben lapoktsü, aser lokti adenshia tekülem sentong agitsü.

Parliament sangdong ka ajanga coronavirus wara anema tenokdangbatem agentsü metetdaksüba sülen anogo ka lir yimsü lenirtem aser public health officials senden ka amenba sülen tanaben Tenla kitem lapoktsü atema metetdaksü.

March 17, 2021 nü Northern Ireland nung Khristan putirtemi, Temeshi Hopta aser Easter nung Tenla kidang lokti adenshia tekülem sentong agitsü saka wara prokba nokdangtsü atema kanga kümdangtsü, ta metetdaksü.

Lokti adenshia tekülem sentong agitsü jelia Arogotem aser Covid-19 support team-i taruba Hokolbar (March 26) nungi lenla ajak nungi asadangtsü.

Ajisüaka peipei Arogo sasap nung tensa dak apet Tenla kitem melapokyonga kecha masü, ta putirtemisa metetdaksü.

"Lokti adenshia tekülem sentong agitsü atema mapang tetemsü asü masü, ta nisung ajaki shisadangtsüla," ta lenirtemi metetdaksü.

Church of Ireland nunga Good Friday, April 2 nungi

tenzüka Tenla kitem lapoka lokti tekülem sentong agitsü telemtetba agiogo.

Tekülem sentong nung adentsü atema Tenla kidangi aoertemi tenüng züluoktsü, nisung tsüngda pilar amentsü aser ajaki mask agitsü. Iba ya tetuyuba ka masü saka temepishiba ka lir, aser nisung ajaki kanga kümdangtsüla, ta lenirtemi metetdaksü.


Methodist aser Presbyterian Arogotemia Tenla kitem lapoka tekülem sentong agitsü.

Methodist Arogoi sangdong ka ajanga, "Good Friday nungi tenzüka tekülem sentong agitsü, kechiyong ibaji ajanga Khristantem atema tongtibangtiba anogo- Easter atema renema litettsü," ta metetdaksü.

Presbyterian Arogo nung otongdar kati, "Easter atongtsü jelia Tenla kitem lapoktsü melaba atema kanga pelar, kechiyong iba mapang ya Khristantem atema kanga tongtibang mapang ka lir," ta metetdaksü.

Coronavirus anema tanaben tenokdangbatem benokba sülen January ita nung lokti adenshia tekülem sentong agiba anena liasü, ajisüaka north Belfast nung Whitewell Metropolitan Tabernacle Arogo densema Arogo karibo lokti adenshi tekülem sentong agia arudar.

OLONG PAITEP # 5757



TIPILEN

2. Sü jeplok
4. O agi merenshi
7. Ayongküm li
8. Chiyungtsü mapang süiadok
9. Tsüngrem den jembiba
12. Saklok
14. Samaba mebushitet
15. Mejanga onü
16. Tzü shiruru ka

LANGTSÜNGLEN

1. _ _ _ _ i
3. Kasa masü
5. Nüchi masü
6. Tashi endok
9. Langtem
10. Anü malidang
11. _ _ _ _ _ kibur
13. Tebur tembar tsüngda
jatepba

OLONG PAITEP # 5755 TELANGZÜBA

TIPILEN :

1. Lemsä, 3. Osang, 5. Mezüng,
6. Agi, 7. Süra, 8. Tebutem,
9. Amen, 12. Odi, 13. Asayar,
14. Angsü, 15. Agima.

LANGTSÜNGLEN :

1. Lamen, 2. Sangken, 3. Omen,
4. Asüküm, 7. Sendong, 8. Tejang,
10. Tanga, 11. Tazü.

Agüja aliba noksa nung meputepi aliba 7 bushiang



TANÜBO NAI LANGZÜANG

Q. Koba küm Index Monitoring Cell tenzük?

A.2019

B.2020

C.2017

D.2018

===== (Taruba adok nung onoki langzüksü)

YASHI ADOK TELANGZÜBA : 2600m

AO OSHI ANGAZÜKDAK:

TANÜ ANGAZÜKTSÜBA OJANG

Aso

(v.) Chipo nung tzü enoker metsü mersü enoka aon mendaktsüba (cooking curry)

• Mapangsertemi aksbi kanga junga aso.

Soru

(v.) Chipo nung tzü enoker jang agi chi kuma mendaktsüba (cooking rice)

• Lai chi soru kanga junga meteta lir.



Tir Yimym

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.

1. Tenüng :
2. Tasoba anogo :
3. Küm :
4. Class :
5. School :
6. Talidak :
7. Salem osang :

Tepela Tasoba Anogo



NAI-A YA METETTER MA?

INDIA NUNG NÜBURTEMI SAPUA ALIBA TWO WHEELER 10: FEBRUARY 2021'

- | | |
|--------------------|----------|
| 1. Hero Splendor | 2,47,422 |
| 2. Honda Activa | 2,09,389 |
| 3. Hero HF Deluxe | 1,26,309 |
| 4. Honda CB Shine | 1,15,970 |
| 5. Bajaj Pulsar | 81,454 |
| 6. TVS Jupiter | 52,189 |
| 7. TVS XL100 | 51,445 |
| 8. Suzuki Access | 48,496 |
| 9. Bajaj Platina | 46,264 |
| 10. RE Classic 350 | 36,025 |



SUDOKU # 5799

					1			
6	1		3	9			5	
				4	2	3	1	
		6	7				4	
1		8		3		2		
	5		1	6			9	3
4								
3					5	2	4	
5			8	7	4		3	1

TELANGZUBA # 5798

1	2	3	6	9	7	8	4	5
4	8	9	5	1	2	3	6	7
6	7	5	3	8	4	1	2	9
8	3	7	9	4	6	5	1	2
5	1	2	7	3	8	4	9	6
9	4	6	1	2	5	7	3	8
3	5	1	2	7	9	6	8	4
7	9	4	8	6	1	2	5	3
2	6	8	4	5	3	9	7	1

OJANG LUTEP # 5344

- NGMATAJU :
 NGNU :
 SÜMA :
 KASA :
 JUTANG :
 NGNU :
 KTETOPBA :
 GIJA :
 IMAAL :
 ERAIN :

OJANG LUTEP TELANGZÜBA # 5343

ATSÜKSHISHIA ASÜ DANG NUNGIBO TEBURCHI KÜMER
AJAKI NGUA ASÜ TAJUNGBA

TAN HOPTA ATEMA - KOMA SÜLA ?

Q. Municipal aser Town Council nung tetsürtem menden asoshi menden 33% shiteta yutsütsü melena political party shia 33% tetsür candidate shim nunga koma süla?

Olong 20 shi nung March 19, 2021 tashi nung iba telangzuba ya onok dangi (e-mail - tiryimym@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanga yokang. Telangzubatemi taruba Honibarnü adoktsütsü.

Bendangertem aitbaji Mamata mapatong ajanga lir: Modi



March 18, 2021 nü Purulia district nung West Bengal election atema BJP pur nüboyim sentong ka nung Ato kilonser, Narendra Modi adenba noksa nung angur.

Purulia (West Bengal), Metsüremi/March 18 (Agencies): Brihostibarnü Ato kilonser, Narendra Modi-i, West Bengal Chief Minister, Mamata Banerjee-i vote bank politics asayaba agi bendangertem state telungi aiter, ta aitsü.

West Bengal nung tribal nütsüng aika aliba Jangalmahal region kübok Purulia district nung election nübuyim sentong ka nung jembidang Modi-i, Trinamool Congress (TMC)-i Dalit nung, backwards aser Adivasis nungertemji par nisung amai mebilemer, aser

TMC ajanga item nisungtem kanga takoksa angur, ta ashi. Paisa, Mamata-i aniba sorkari Maoists telungpurtem kümzüka ayur, ta ashi.

"Bendangertem ozüng alema arua aliba tongti kuliji Didi (Mamata)'er sorkari mesüzükba aser vote bank politics asayaba ajanga lir," ta Ato kilonseri ashi.

Assembly election votes azüngba anogo May 2 nü Mamata-i asayaba anentsü aser terenlok tenzüksü, ta pai ashi.

Vote angutsü atema Mamata-i telok ka mesüzüksü meranger, ta aija

Modi-i, "Bengal nüburtem temelung kanga zünga lir aser mamadoker. Sepaitemi atsüngdoktsü merang ta aitsürji Bengal nüburtemi mamadok lir, Pulwama amakba mapang aser Batla House tatalokba nung nai (Mamata) shirnok pusemar nüburtemi bilemteter," ta ashi.

Covid wara ajanga linük shibangba mapang nunga TMC sorkari oshimashi inyakogo, ta shia Modi-i, "Onoki Direct Benefit Transfer (DBT) inakyim benshir saka TMC-i Transfer My Commission benshir," ta aitsü.

Shinga nem-a Delhi nüburtem indang tashi magütsütsü: Kejriwal

New Delhi, March 18 (Agencies): Centre sorkari Parliament nung NCT Bill benokba aija Delhi Chief Minister aser Aam Aadmi Party (AAP) tongti lenir, Arvind Kejriwal-i, AAP aser pai aniba sorkari Delhi nüburtem atema ajak inyaksü renema lir, ajisüaka Centre sorkar nem nüburtem indang tashi magütsütsü, ta metetdaksü.

Bodhbarnü Jantar Mantar, New Delhi nung NCT Delhi (Amendment) Bill, 2021 (NCT Bill) anema longkak aitba sentong nung jembidang Kejriwal-i, "Delhi nüburtem atema ajak inyaksü onok renema lir. Nenoki inyakba mapatemji onoki menokdangtsü aser onoki-a Delhi nüburtem indang tashi magütsütsü," ta metetdaksü.

Hombarnü Lok Sabha nung benokba National Capital Territory of Delhi (Amendment) Bill, 2021 ya agizüka ozüng kümra Delhi Lieutenant-Governor (L-G) nem tashi tulu agütsütsü.

Iba Bill benokba ajanga Centre aser Delhi sorkar na tsüngda mangatettep tulu

adokogo.

Arvind Kejriwal-i, BJP sorkari iba Bill ajanga Delhi nüburtem tashi agitsü meranger, ta aitsü.

Ano külen BJP-ibo, iba Bill ajanga Centre aser Delhi sorkar tsüngda tajungtiba amalitepa inyaktettsü aser Delhi nung terenlok mapatem kanga keraa inyaktettsü, ta ashir.

Kejriwal-i, "Iba Bill ajanga yamai ashir, Delhi sorkar tetezü LG. Yamaji süra nüburtemi shimtetba ozü sorkar tetezü kechi? Delhi nüburtem tetezü kechi asütsü? Delhi chief minister tetezü kechi asütsü? Iba Bill ajanga Delhi nüburtem kanga jashir, ibayongji adenshir iba Bill anema longkak aiter," ta metetdaksü.

Centre sorkar aija Kejriwal-i, Delhi ji LG-i yimsüsütsü süra kechiba linük yimtiba nung assembly elections ayongzüka agir?" ta aitsü.

"BJP-i Delhi elections nung takok mangur, ibayongji parnoki ashikülak agi yimsü süner. Nüburtemi yimsüsüba parnoki anentsüner," ta paisa aitsü.

Covid mapang mashisa tsür timba asübaji India nung asütsü: UN

New Delhi, March 18 (Agencies): 2020 küm South Asia linüktem nung arrshi küm 5 tekübokpurtem timba asübaji India asütsü aser coronavirus wara ajanga India nung health services tsütsü timtem adokba ajanga mashisa tetsürtem timba asübaji India asütsü ta asadangtetogo, ta UN report ka ajanga metetdaksü.

Kasa report ajanga ashiba agi, India-i taküm September ita tashi nung covid tendangba aser healthcare tsütsü US sen billion 10 jungnüa indoktsü, aser ibaji region nung timtiba asütsü.

UNICEF, World Health Organization (WHO) aser United Nations Population Fund (UNFPA)-i renemba report- 'Direct and indirect ef-

fects of the Covid-19 pandemic and response in South Asia' nung shia aliba agi, 2021 küm tenzüker February ita tashi nung South Asia nung nisung million 12 tema dak Covid-19 putetogo, aser timtibaji India lir (10.9 million).

Iba report ya talisa South Asia nung nütsüng aika aliba linük trok- Afghanistan, Bangladesh, India, Nepal, Pakistan aser Sri Lanka nung rangloker renem.

Coronavirus wara ajanga item linüktem nung tanur aser tetsü, rongsenkettsüng, mapa aser shisaliok nung mejungi kongshitsü, ta kasa report ajanga metetdaksü.

2020 küm linük trok nungji arrshi küm 5 tekübok tanur

228,641 shi sür asütsü aser timtibaji India (154,020, shilem 15 agi timba) aser Pakistan (59,251, shilem 14 agi timba) linük na nung asütsü, ta report nung shia lir.

Iba denji kasa coronavirus wara ajanga mashisa tsürtem timba asübaji India (7,750, shilem 18 agi timba) aser Pakistan (2,069, shilem 21 agi timba) na asütsü.

WHO South-East Asia Region nung Regional Director, Dr. Poonam Khetrapal Singh-i, nüngdakba health services agütsütsüji WHO indang asalentong tongtibatiba lir, anungji wara liaka maneni asentenshir nüngdakba health services agütsütsüla, ta metetdaksü.

2022 election matongdangsa tenangzüka ajak inyaksü: Amarinder

Chandigarh, March 18 (Agencies): 2022 küm Punjab Assembly election magidangsa nüburtem dang temoatsü meshia 2017 küm election nung onoki nangzüka ajak inyaksü, ta Congress lenir aser Punjab Chief Minister, Captain Amarinder Singh-i metetdaksü.

Brihostibarnü state nung Congress sorkar küm 4 abensaba nüngtem nung Chandigarh nung osangbenertem senden ka nung jembidang Amarinder-i, Punjab nung Congress den tetokteper mali, kechiyong Akali mesüra Aam Aadmi Party (AAP) naprongla jenjang majung, ta ashi.

"Onoki tenzüka mapatemji renema inyaksü" ta nangzüka pai, 2017 küm election mapang nung Congress-i nangzüka ajakji taruba election matongdangsa inyaksü, ta metetdaksü.

Taoba election manifesto nung tenangzükbaten shilem 85 bo onoki inyakogo, aser state kecha nunga yamaji meinyakdang, kechiyong taoba mapang Andhra Pradesh nung Chief Minister, Chandrababu Naidu-ia election mapang nangzüka shilem 81 dang inyakteta liasü, ta ashi.

State nung Congress sorkari inyaktetba tulutibaji Punjabiyat lir, kechiyong ibaji ajanga state nung tesünep lir,

ta pai ashi.

Aluyimer ajak dang sentsüh atoktsü aser mapa mangur lanur shia nem ita shia sen 2,500 agütsütsü nangzüka dak sendakba nung tasüngdangba ka langzüdag Chief Minister-i, "State nung senotsü tsütsü timtem lir, aser ibaji talisa coronavirus wara ajanga lir, ibayongji sorkari tenangzüka karbo meinyaki atatsüsa aküm. Ajisüaka senpongi saru aitba timba kümдар, anungji tekaraba nung item tenangzüka ataloktsütsü," ta ashi.

"Aluyimer lakh 5.64 dangbo sentsüh tokogo aser sentsüh atokba mapatong ajanga tang alu nung aayangertem tajangzükgudar," ta paisa shisem.

2020 küm nü leniba nung tokteptsü asü aser na Chief Minister candidate asütsü asü?, ta asüngdangba langzüdag pai, iba telemtetbaji Congress Tiri agitsü, ta ashi.

EVMs aser Paper Ballots dak sendakba nung tasüngdangba ka langzüdag Chief Minister-i, electronic voting machines (EVM) amshiba anema oa adoker mezüngpurtem rongnung pa liasü, kechiyong EVM ji raksaa amshitettsü, ta ashi. Japan, Sweden aser UK ama kanga terenlok aliba linüktemi-a EVM mamshir, ta paisa shisem.



March 18, 2021 nü Port Blair, Andaman & Nicobar Islands nung Indian Navy indang Indian Naval Landing Craft Utility (LCU) L58 rong semzüka sentong nung tangokba noksa nung angur. Iba rong ya Landing Craft Utility (LCU) Mark IV Class 8buba lir.

China-i Pakistan nem COVID-19 mozü batch tanabuba agütsüogo

Islamabad, Metsüremi/March 18 (Agencies): China-i Sinopharm mozü doses 500,000 tenla agütsüba Pakistan-i agizükogo, anungji linüki iba mozü doses million ka agizüker alitsü, ta Health Minister Dr Faisal Sultan-i ashi.

Nütsüng yongsük million 220 aliba linük nung nüburttem nem COVID-19 mozü agütsüba maparen ya March 10 nung tenzüka teintet rogo nem mezüng agütsü. Health worker tem iba mozü ya February ita tetenzüklen nungi agia lasü.

"Item doses 500,000 yagi asen linük nung mozü agütsüba maparen nung tetsükdaktsü majurutsü, koba tang teintet rogotem nem agütsüba mapang lir," ta Sultan-i Bodhbarnü tweet ka ajanga ashi.

Tang iba linük nung coronavirus mozüji Sinopharm ya ya dang lir, koba nisung shia doses ana-na agütsütsüla.

Pakistan nung mozü agütsüba maparen ya kanga ilonga masü, kechiaser

nüburtem aser healthcare worker temi iba mozü agütsü memolung.

Linük nung COVID-19 tendangba mapang shilem 6.26 dak iba tashidak puteter aser Punjab nung shilem 11 ajunger, koba province tulutiba lir.

Pakistan nung tang nisung 615,810 dak coronavirus puteta lir aser kasa virus agi nisung 13,717 süogo, aser tesüiba ghonda 24 tsüngta nisung 3,495 dak iba tashidak putet aser nisung 61 asü, ta Brehostibarnü sorkari sangdong ka nung ashi.

Ita asem tsüngta anogoshi putetyonga aruba rongnung ibai timtiba alitsü aser iba yongji ketdangsürtemi lokti adenshiba nung tenokdangba agütsü aser virus wave asem buba arutsü, ta t e k u m d a n g t s ü metetdaktsüoko.

Pakistan nung tang tashi mozü yanglur nungi mozü alitsü jembia mali aser parnok ya makamait linüktem asoshi tenzüka GAVI/WHO COVAX initiative aser tenla

nung dang metaloker alir.

Ita tatemlen tashinung Pakistan-i AstraZeneca indang Mozü doses million 2.8 angutsü imlar, ta ketdangsür kati ashi.

Sinopharm aser AstraZeneca kisüng masü, Pakistan-i Russia indang Sputnik aser China indang CanSino Biologics Inc's (CanSinoBIO) mozü tem ajungben mapang amshitsü melanlir.

CanSinoBIO ajanga linük balala nung par mozü tendangba osangtem sangdonga lir, aser item rongnung Pakistan dena lir, kong coronavirus agi shiranger taneptsü anguba shilem 65.7 aser kanga sashia kangshiba shilem 90.98 taneptsü angur, ta sayur.

Pakistan nung CanSinoBIO mozü yagi symptomatic cases nungi nokdangba shilem 74.8 aser tashidak tamajung nungi kumzüka shilem 100 sayur.

Pakistan nung cinema, theater aser kiyimba sentong nung lokti tulu adenshitsü mela aliba taoba hopta tanaben nokdangshi.

Tanzania Tir John Magufuli süogo

Dodoma, Metsüremi/March 18 (Agencies): Tanzania Tir John Magufuli süogo, ta linük indang tatong tir sangdong, shiba hopta ishika kong ali mesüra pa temang koma ali mejangjai lia ruogo.

Bodhbarnü menur television ajanga linük den jembiba mapang, arishi küm 61 tain tir ya temolungjang timtem agi Dar-Es-Salaam nung mozüki ka nung asü, ta Vice President Samia Suluhu Hassan-i ashi. Magufuli ya küm ter iba timtem anepalua arua lasü.

Linük nung anogo 14 mangyim tenzüka mapang Tanzania nungertemi nisan tum nung sendaka lasü.

Magufuli ya March 6 nü Jakaya Kikwete Cardiac Institute nung mapang tatsüka among, saka iba mozüki nungi alu, ta Hassan-i ashi. Ano pa temang mejungi akumba sülen March 14 nü mozü kidangi anir ao.

Pa asüba osang sangdongba sülen opposition lenir Zitto Kabwe-i, Hassan den jembioago aser Magufuli asüba indang asükhulemsateptogo, ta ashi.

"Asen linük terenlok atema pai shilem agiba asoshi linüki pa teti bilemtettsü," ta Kabwe-i Twitter nung osang ka sangdonga lasü.

Tanzania Constitution nung arishi küm 61 tain Hassan yagi tir Magufuli indang küm pongu kümsük tanüngba ya inyaka atatsü, koba taoba küm tenzüka lasü. La ya linük nung tetsürtem rongnungi tir mezüngbuba akumtsü.

Tir ya meshiranger, ta sorkari jembia aruba sülen pa asüba osang ya sangdonger. Pa yimjak nung hopta asem jungnüa manguba asoshi telanzüba agüjang ta kinük ajungalen nungi ola adoka pa ya COVID-19 asoshi bendanglen temang anepalur, ta olulu adoka lasü.

Opposition lenir Tundu Lissu, shiba 2017 küm tepsettsü meranga 16 ben akha aser tang Belgium nung jenoka ali, pai Magufuli ya COVID-19 agi asü, ta ashir.

"Magufuli ya corona agi asü. Aji ka. Tanabuba nung, Magufuli ya tanü asüba masü. Pa kanga mejungi shiranger ta kü nem osang agütsürisa Magufuli ya taoba hopta Bodhbarnü sür lasü, ta ashir," ta pai Kenya indang KTN News dang ashi.

Magufuli ya yimjak nung February 27 nü tatemsa ngua lasü aser sorkar ketdangsürtemi pa temang junga lir, ta jembia aru.

Mapang talangka nungi Magufuli-i COVID-19 ya süoki ia magizüki aru aser iba

tashidak aneptsü atema Tanzania nung sarasadema pei alidak anguba mozütem amshitsü ajungshia lasü.

Tanzania nung 2020 küm April ita nungi coronavirus agi nüburttem menepba osang sangdongba anena lasü, aser hopta ishika lir Magufuli-i June ita tanüla temeshi agi linük nung coronavirus samaogo, ta sangdong.

Pai face mask agitsü mesüra lockdown meratem agitsü memolung. Saka pa yimjak nung tatemsa anguba sülen Magufuli-i iba virus ya linük nung tang tashi lir, ta sangdonga lasü.

"Bulldozer" ta nüngja agüja alisang Magufuli-i ochimashi inyakyim samatsütsü aser ki-o-jen terenlok tali kumtsütsü nangzüka sülen 2015 election nung tir inyaktsü shimteta lasü.

Saka pa kisüangi sorkar tashi ajunga amshitsü meranga media, civil society aser opposition anema nokdakba mechi par tembar bendang linüktem aoksatep.

Taoba küm October ita pa tanaben tir inyaktsü shimshiba ya opposition temi magizük, kechiaser election mapang foreign media aser observer team tem nokdang aser mitkartem sashia yoka lasü.

Pai shisaliok angati agütsüba, rural electrification aser railway, hydropower dam amala yangluba nung temolung agütsüba ajanga nüburttemi sapua lasü.

Tanzania indang ali rongsen nung par sorkari jenjang temloaktsü asoshi ozüng aika yanglu aser bendanger mining company tem dang nungi tax sen million aika meshia lasü.

Saka pai coronavirus junga ketdang mesütetba ajanga nüburttemi pa lenisüba nung temolung melemtetaki.

Magufuli-i COVID-19 khuret mabenba, pai linük nung lockdown benoktsü memolungba ajanga nisung aika mejangjateti asü, ta pa anemertemi ashir.

Magufuli ya Tanzania northwest tsütsü Chato district nung Lake Victoria tzükum nung aso, aser pa azüki ka nung lia kiset shiruru anepalua, mamatzü yoka aser ango pua par kibong mesüa lasü.

Pa nem University of Dar es Salaam ajanga chemistry nung doctorate konang agütsü aser Britain indang University of Salford nunga zünga lasü.

Magufuli ya ruling Chama Cha Mapinduzi (CCM) party züngsem lasü, aser 1960s tetenzüklen Britain nungi nüjiso anguba sülen iba telok yagi yimsü süa arur.

Magufuli ya kibong kumer lasü aser tanur pongu lir.

Myanmar nungi refugee aika Thailand nung jenoker

Mae Sot, Metsüremi/March 18 (Agencies): Taoba ita mitkartemi tashiyim amshia sorkar atsüngdokba sülen nisung noklang aika Myanmar yimti aser jila tem toktsür jena oa Thai arrtsü nung ethnic militia temi amokbanga aliba tesemtem nung jenoka lir, ta telok ka indang ketdangsüri Brehostibarnü ashi.

Karen National Union (KNU) nungi ketdangsürtemi ashiba agi, nisung meyrirjang jungnüa KNU-i amokbanga aliba litsü nung jenoka lir. KNU yagi Myanmar army den küm ter dak tema rara arur.

Tashiyim amshia sorkar atsüngdokba anema nokdaker

nisung 217 shi Myanmar sepaitemi tepsetogo, ta Myanmar nung aliba civil rights group, Assistance Association for Political Prisoners ajanga ashir.

"Nisung noklang aika onok tesem nung lir," ta KNU indang foreign affair tekolakba, Padoh Saw Taw Nee-i sensaksem ka nung ashi.

"Kar longkak aitba lenirtem, kar CDM (civil disobedience) nung dena lir, sorkar mapa inyaker... police mapa yutsür jena arur, mitkar aser ano karbo parliament züngsem aser doctor tem lir."

Ano nisung telok tilaka north tsütsü Shan state den

arrtsü anasa jenoka lir, aser iba tesem ya ethnic militia telok danga kati yimsü asür.

Myanmar arrtsülen ethnic telungpur telok 20 dak tema lir aser mitkartemi sorkar atsüngdokba aitsürtem rongnung KNU ya ka lir.

Sorkar matsüngdok dang ceasefire tezüngzüktep yangluba amajok kümogo, ta Padoh Saw Taw Nee-i ashi.

"Onoki CDM movement aser nüburttemi longkak aitba busemer," ta pai ashi.

Thai ketdangsürtem asoshi refugee tebilemtsü tali akumer aser Mae Sot district nung nisung 43,000 dak tema jenokdaktsütsü renema lir, ta ashir.



United States kübok Georgia state nung spa asem nung Mongulbarnü injang agi Asia tsür timba sür nisung ti kasetba sülen Acworth, Georgia nung March 17, 2021 nü Young's Asian Massage kima nüburttem mangyimba mapang tangokba noksa ka yangi angur.

'Demi Lovato-i kenseptasen kayakta sayatsü



New York, Metsüremi/ March 18, 2021 (Agencies): Kentener, Demi Lovato-i 'Dancing with the Devil...The Art of Starting Over' ta nüngja agütsüba kensep tasen ka April 2, 2021 nü sayatsü.

Clubhouse nung live-stream sentong agiba mapang, Demi-i 2017 küm sayaba 'Tell Me You Love Me' den tatongtep kensep indang metetdaksü aser la indang aruya aliba documentary series, 'Demi Lovato: Dancing with the Devil' nunga iba kensep ya sendaktepa lir ama asadangteter. Demi-i, la indang Hombarnü (15.03.21), iba

live-stream sentong agiba mapang, Demi-i iba documentary dak sendakba nung tesüiba küm ishika tejakdang la taküm nung ajangshibatem lemsatepa liasü. Arishi küm 28 tain Demi-isa, tetsür artist asem den longjemer ken balala record asüba indang osang metetdaksü. Iba LP, kong ken 19 aser bonus track asem dena lir, iba record atema Demi aser la indang manager, Scooter Braun na executive producer ama inyakogo. Demi-i, la indang documentary series koba

shilem pezü nung lemsar yangluogo, iba series ya March 23, 2021 nü nungi tenzüka YouTube nung angutsü. "Kü taküm nung timtem ajurur sülen küm ana süiogo aser tang alima dang ni ajangshibatem lemsateptsü asoshi renema lir. Ni temesepba mozü amshidang taküm nung timtem ajuruba aser iba inyakyim toktsütsü merangdang ajangshia arubatem iba documentary ajanga sayutsü. Nenok den kü taküm otsü lemsateptsü maongka anguba asoshi pelar," ta Demi-i ashi.

Samsung Galaxy A52 aser A72 sayaogo

Samsung Galaxy A52

6.5" Super AMOLED display

64MP Quad rear cameras

32MP Selfie camera

4,500mAh Battery (25W fast-charging)

Samsung Galaxy A72

6.7" 90Hz Super AMOLED display

64MP Quad rear cameras

32MP Selfie camera

5,000mAh Battery (25W fast-charging)

New Delhi, Metsüremi/ March 18, 2021 (Agencies): South Korea indang tech company tetsüti, Samsung-i 'Samsung Galaxy A52', 'Galaxy A52 5G' aser 'Galaxy A72' sayaogo. Samsung Galaxy A-series ya sentsü pezü - Awesome Black, Awesome Blue, Awesome Violet aser Awesome White nung angutsü. Iba Smartphone serie ya Europe nungang sayaa lir aser India shishilembadak angutsü asoshi company ajanga osang ano magütsü. Smartphone asempronlga nung quad rear camera, Dolby Atmos, IP67 certification aser tanga feature aika angutsü. Item phone asem rongnung, Galaxy A52 5G nung 120Hz display aser Galaxy A52 nungbo 90Hz display angutsü. Samsung Galaxy A52 jenjang EUR 349 (sen 29,600) aser Samsung Galaxy A52 5G jenjang EUR 429 (sen 31,000) asütsü. Ano külen, Samsung Galaxy A72 jenjang EUR 449 (sen 32,500) alitsü. Samsung Galaxy A-series smartphone tasenba nung Android 11-based One UI 3.1 inoka yanglutsüogo. * **Samsung Galaxy A52** Samsung Galaxy A52 nung

6.5-inch full HD+ Super AMOLED Infinity-O display den 90Hz refresh rate keta lir. Iba smartphone ya octa-core SoC den 8GB RAM aser 256GB internal storage ajanga tashi agütsür aser 4,500mAh battery ka ajanga phone inyakyim nungittsü. Camera tsütsü repringdangra, iba smartphone tesülen quad camera setup ka angutsü, kong 64-megapixel primary sensor, 12-megapixel secondary sensor, 5-megapixel depth sensor aser 5-megapixel macro shooter dena lir. Iba den külemi, phone tejaklen, 32-megapixel selfie camera ka angutsü. Connectivity atema, Samsung Galaxy A52 nung 4G, Wi-Fi, Bluetooth, GPS/ A-GPS aser USB type-C port inokja lir. * **Samsung Galaxy A52 5G** Samsung Galaxy A52 5G nung 6.5-inch full-HD+ Super AMOLED Infinity-O display den 120Hz refresh rate angutsü. Regular variant ama, iba smartphone nung octa core SoC den 8GB RAM aser 256GB internal storage angutsü; aser 4,500mAh battery ka ajanga phone inyakyim nungittsü. Company-i ashiba agi, iba

smartphone khi charge nung anogo ana tashi amshiteter. Camera tsütsü repringdangra, Samsung Galaxy A52 5G nung A52 4G variant ama 64-megapixel primary sensor, 12-megapixel ultra-wide angle shooter, 5-megapixel depth sensor aser 5-megapixel macro shooter angutsü. Selfie janrar atema, Samsung Galaxy A52 5G nung 32-megapixel front shooter ka keta lir. * **Samsung Galaxy A72** Samsung Galaxy A72 nung 6.7-inch full-HD+ Super AMOLED Infinity-O display den 90Hz refresh rate inoka yanglutsüogo. Octa core processor den 8GB RAM aser 256GB internal storage ajanga iba smartphone maparen achaayangtsür. Memory ulua aginürtemi microSD card ka ajanga 1TB tashi atsülanga amshitetsü. Samsung Galaxy A72 nung quad rear camera setup ka angutsü, kong 64-megapixel primary sensor, 12-megapixel ultra-wide-angle shooter, 5-megapixel macro shooter aser 8-megapixel telephoto shooter dena lir. Connectivity atema, Samsung Galaxy A72 nung 4G, Wi-Fi, GPS/ A-GPS aser USB type-C port ka angutsü.

PELABA LEMSATEPER

Onoki teti meima aliba, Ojala **YASHISOLA** (Longmisa) shiranga alidang aser ozü asüku mapang kija - kibong, kidang-kiyonger, yimer-yimsanger, arogo aser tembartem shirnokisa onok dang aria bilema nübo, rongsen aser sarasadem agi nungita yariogo, nenok ajak dang onoki kanga pelar. Onoki kecha lepa magütsütettsü saka Tulusang Tsüngremi nenok ajak moajangma ta ozü tamang sarasadem. - **Temeim Chirnur aser Kinungertem.**

1966 - 02:03:2021.

IN THE COURT
PRINCIPAL DISTRICT & SESSIONS JUDGE
MOKOKCHUNG: NAGALAND
S/C NO. 42/2021
NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of late Takarenba has been applied by Smti. Moakala W/o Lt. Takarenba R/O H.No 137 Dilong Ward, Mkg Nagaland for possession of: GPF, GIS, Gratuity, Leave encashment, Pension etc. Closing of A/C. Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 16.4.2021

Given under the hand and seal of the court on this the 16.3.2021

Sd/-
Principal District & Sessions Judge
Mokokchung : Nagaland

Zayn Malik aser Chris Stapleton na longjemtsü

Los Angeles, Metsüremi/ March 18, 2021 (Agencies): Nüngtugu Country kentener Chris Stapleton den longjemer ken yanglutsü asoshi Zayn Malik tebilemba lir. Bodhbarnü (17.03.2021) arishi küm 28 tain Zayn-i folk-pop kentener Ingrid Michaelson den den longjemer yangluba ken 'To Begin Again' ka sayaogo, kong pai country music kanga sapuba lemsatep aser tarutsü nung Grammy Award takok angusang Chris den longjemer music yanglutsü asoshi janraba indang metetdakja liasü. Radio.com den jembiba mapang, Zayn-i, "Ni Country music aika angar. Country ken tenteter ola tajung ajak ni sapur aser meimer," ta ashi. Taoba mapang One Direction star Zayn-i ashiba agi, "Ni Chris Stapleton kanga sapur aser pa den külemi music yanglutsü tejanraba lir. Iba maparen atema ni pa den jembia liasü aser pai music külemi yanglutsü asoshi janra aliba kü

dang shia lir asünung, tarutsü anogotem nung pa den longjemer music yanglutsü sentong lir." 'Dusk Till Dawn' kentener Zayn-i 'To Begin Again' ken indang lemsatepa liasü. Iba ken ajanga alima ajunga asüngba COVID-19 wara lendong nung nüburtemi timtem ajangshia aruba sülen tanaben pei maparen tenzüshitsü indang jembir. Ingrid den iba ken indang jembiba mapang, Zayn-i, "Iba ken ajanga meimchir taküm nung timtem ajangshia arubatem jembir aser ken yagi kü mulung nung kongshiogo; aser ibajagi iba music nung ni shilem agütsü ajungmeso," ta ashi. Taoba küm President Joe Biden-i US presidential election takok anguba sülen, Ingrid-i iba ken zülutsü aser lai, iba ballad atema Zayn ola ya tetemsü ta shia pa nem tenüngsang agütsüogo. Taküm January ita Zayn-i pa indang kensep tasembuba - 'Nobody Is Listening' sayaba sülen 'To Begin Again' ken sayar alitsü.

Redmi Note 10 Pro ayok tenzükogo

Metsüremi/ March 18, 2021 (Agencies): Redmi Note 10 ayok tenzükba sülen anogo ka lir tanü nungi Redmi Note 10 Pro ayok tenzükogo. Redmi Note 10 Pro ya iba ita tetenzüklen sayaa liasü. Iba smartphone nung Qualcomm Snapdragon 732G SoC, den 8GB RAM aser 128GB internal storage keta lir. Redmi Note 10 Pro nung 64-megapixel primary camera ka densema quad rear camera setup ka keta aliba angutsü. Redmi Note 10 Pro tanü 12:00 ako nungi Amazon, Mi.com, Mi Home, aser Mi Studio store tem nung ayok tenzükogo. Iba smartphone 6GB RAM + 64GB storage variant sen 15,999, 6GB RAM + 128GB storage model sen 16,999 aser top-spec 8GB RAM + 128GB storage variant sen 18,999 agi yokdar. Redmi Note 10 Pro alirtemi ICICI Bank credit cards amshira aser EMI transactions

mapang sen 1000 ajemer agütsütsü. Maneni MobiKwik ajanga phone alira cashback sen 5,000 angutsü. Redmi Note 10 Pro nung Android 11-based MIUI 12 keta lir. Smartphone nung 6.67-inch full-HD+ Super AMOLED display den 1,200 nits of peak brightness keta lir. Ano iba phone nung Qualcomm Snapdragon 732G SoC den 8GB RAM aser 128GB internal storage keta lir. Iba phone nem 5,020mAh battery ka ajanga tashi agütsütsü aser 33W fast charging dena support asütsü. Redmi Note 10 Pro nung quad rear camera keta lir kong 64-megapixel primary Samsung GW3 sensor ka, 8-megapixel ultra-wide shooter ka, 5-megapixel super macro shooter ka aser 2-megapixel depth sensor ka keta lir. Tejaklen Redmi Note 10 Pro nung 16-megapixel selfie shooter ka keta lir.

'Spring Badminton C' ship' takok ngua tembangogo



Spring Badminton Championship nung takok angurtem den tetushi tesemdang, Moatoshi Tzüdir aser Soyim Shuttlers ketdangsürtem külemi tangokba noksa nung angur.

Ungma, March 18 (TYO): Mokokchung District Badminton Association (MDBA) akhüm nung Soyim Shuttlers-i ayongba 'Spring Badminton Championship' March 17 nü yangi Babu Tzüpu Amphitheatre Ungma nung takok ngua tembangogo.

Iba asayamung nung asaya telemsa asem (3); Men's doubles, 35+ Men's doubles, 45+ men's doubles liasü. Asaya telemsa balala nung telok 30 dak talii shilem agia liasü. Takok angur nem senpet kuli kaket den sen agi senpetsü.

Asayamung shibangba aser senpet agütsüba sentong nung

tetushi tesemdang Class 1 contractor & NDPP Active Member, Moatoshi Tzüdiri jembidang, sorkari lanurtem atema saisapong ajanga tapu jenti inyakba mapang ka lir, Ungma ama yimtisanger aser tejakleni renloka aoba yim kati

centre o state sorkar na yongtsü nung ongdang aliba nungji apu lateptsür ka ama inyaktet, ibaji ajanga lanurtem tejangraba tongtetsü aser iba jagi Ao kin aser Naga nung songjen tajangzük ngutetsü imlar, ta tayongzükba ka agütsü.

Takok angurtem yamai:

MEN'S DOUBLES:

Winner : Lanuaküm & Temjen

Runner up : Imomar & Imliaküm

35+ MEN'S DOUBLES:

Winner : Temsüyanger & Dr. Sashimatsüng

Runner up : Imomar & Imnayanger

45+ MEN'S DOUBLES:

Winner : S. Bendang Imchen & Temsüyanger

Runner up : Bendangnochet & Nokzentketba

49buba ASA Meet: CYO aser SASA nati takok angu

Kohima, Metsüremi/March 18, 2021 (TYO): Indira Gandhi Stadium, Kohima kübok ayonga agiba 49buba Angami Sports Association (ASA) meet nung Chakhroma Youth Organization (CYO) aser Southern Angami Sports Association (SASA) nati tebur football aser tetsür volleyball asaya takok nguogo.

Tebur football nung takoker team - CYO-i senpet sen 30,000 den trophy, medal aser kulikaket angu. Kasa mapang, runners-up Northern Angami Sports Association (NASA) nem senpet sen 20,000 aser medal den kulikaket agütsü aser Southern ASA aser Western ASA napronglai senpet sen 10,000 den kulikaket agizükogo.

Tetsür volleyball nung, SASA-i senpet sen 20,000 den

trophy aser kulikaket angu. Kasa tetoktepba nung runners-up WASA nem senpet sen 10,000 den kulikaket agütsüogo. Ano külen, CYO aser NASA nati senpet sen 5,000 (meyi pungongo) den kulikaket agizük.

Iba meet lapokba sentong nung, Advisor for Sericulture, Excise & Minority Affairs, Zhaleo Rio alakteta tejaoker ama denogo.

Pai ashiba agi, sports meet ya benjongtepba/pelatepba mapang ka lir, saka tetoktepba tanela nung shilem agitsüla.

Saisapong dak sendakba nung lanurtem ayongzükba mapang, Rio-i, bendanga agütsür asaya nungang saisapong kaji nungtuagu akümtsü ta ashi. Anungji saisapong ajaki pei sempet janga/meteta alitsüla, ta pai

ayongzük.

49buba ASA Meet shibangba sentong nung, Advisor, Technical Education & Election, Medo Yhokha-i iba meet nung shilem agir team ajak nem tenüsang agütsü.

Saisapong atema iba meet ya tatem masütsüla, saka temaba jenjang ajangzükettetsü atema maneni meranga asaytsüla, ta Medo-i ashi.

Chief Minister Neiphiu Rio lenisüba kübok PDA sorkari lanurtem atema alakteta sentong tajung balala bener arutsütsü asoshi asalentong yangludat. Kasa mapang saisapongertem atema 'sporting infrastructure' tajungba agütsütsü asoshi Advisor for Youth Resources and Sports Zale Neikha-i meranga inyakdar, ta Medo-isa shisem.



Kohima, Metsüremi/March 18, 2021: Advisor Medo Yhokha aser ASA ketdangsürtem den 49buba ASA Meet nung tebur football takok angur telok -Chakhroma Youth Organisation aser tetsür volleyball takok angur telok Southern Angami Sports Association külemi tangokba noksa ka yangi angur.

T20 World Cup metenzük dang team ana den India T20I series asayatsü: BCCI

New Delhi, Metsüremi/March 18, 2021 (Agencies): T20 World Cup asayamung atema India cricket team tajungba renemtsü atema, taküm October ita Indian cricket board (BCCI)-i T20I series ana ayongzüktsü asalentong yangludat. Iba series dak sendakba nung BCCI-i South Africa aser New Zealand cricket board den jembishinüdar, ta sangdong ka ajanga metetdaksü.

"Iba T20 World Cup asayamung masayadang, South Africa aser New Zealand team yagi India nung T20I series ana asayatsü sentong lir. Iba asaya dak sendakba nung ano osang tejangja metetdaksütsü. World Cup metenzük dang, team renemshia atatsü asoshi board-i achaayangtsüla," ta senior BCCI ketdangsür kati ashi.

Taoba küm March ita thitsür aliba series atema India aser

South Africa nati India nung series ka asayatsü asoshi mulungteper lir. Tang Ahmedabad nung England den asaya aliba series (T20) sülenbo India team-i T20Is asayatsü atema sentong yanglur mali.

Indian Premier League temer sülen, World Test Championship final (New Zealand team den asayatsü) aser five-Test series atema India team England-i aotsü sentong lir. Asayamung ana ya temer sülen ang September ita tom ka nung India team linüki meyipa arutsü. Ano külen, Pakistan Cricket Board (PCB)-i tanungba Pakistan Super League asayatsü asünung, Asia Cup atema tebilemtsü adoker.

T20 World Cup temer sülen India-i ano New Zealand team den Test series ka asayatsü. Iba sülen, December 2021 aser January 2022 tsüngda tour ka atema India team South Africa-i aotsü.

Penli o Artang na final asayatsü

MOKOKCHUNG INTER-WARD FOOTBALL TOURNAMENT



Mokokchung Inter-Ward Football Tournament semi-final match Artang o Arkong na asayaba mapang tangokba noksa nung angur. Mokokchung, March 18, 2021 (Noksa Agir: Imnawabang Jamir)

Mokokchung, Metsüremi/March 18, 2021 (TYO): Marepkong Youth Association-i ayongzükba 2nd Mokokchung Inter-ward football tournament March 18 nü mezüng semi-final match nungi Penli ward-i Mongsenbai Ward tsükdaksü aser tanabuba semi-final match nung Artang ward-i Arkong pur tsükdakja Penli o Artang na final asayatsü jenjang ajangzükogo.

1st semi-final match Penli ward o Mongsenbai Ward na asayaba, Penli nungi 1st half nung Jersey No. 15 - Takomeren-i mezüng goal ka minute 10 nung agütsü, aser 2nd half nung Penli nungi Jersey No. 8 - Imsuwapang-i minute 54 & 57 nung atonga atonga goal ana idaksü aser pezübuba goal ji Jersey 10 -

Subonglemba Chang-i metsüokja iba asaya goal 4-0 agi Penli Ward-i Mongsenbai madak takok tulu ngua liasü.

Tanabuba semi-final match yaküm champion Arkong Ward o yaküm runner up Artang Ward na asayaba, Artang Ward-i goal 2-0 agi Arkong pur tsükdaksü. Goal anapronglaji 1st half nung dang agütsü aser anaji Jersey No. 37 - Ambangchuba-i minute 5 nung ka aser tanabubaji minute 18 nung Jersey No. 17 - Moa Imchen-i idaksü.

March 20 nü nikong 12:30 nungi tenzüka final match Penli Ward o Artang Ward na tsüngda asayatsü. Iba asayamung shibangba sentong nung District Project Officer, Dept of Land Resources Mokokchung, Dr. Sashiyangba tetushi tesemdang jaoka lir.

BILEMDANGANG

"Sayutsüngi tajung agütsüyonga karibo masüba dang angateter."